

ULLOQ 24. Maj

UPA2023/10

2023-mut Aningaasaqarnermik ingerlatsineq pillugu nassuiaat
(Aningaasaqarnermut Naligiissitaanermullu Naalakkersuisoq)

Nalunaarusiamut imartuummut qujalluta Siumumiit imaattumik oqaaseqarfigissavarput.

Nunarpununa nunatut ingerlaniarnermini aningaasatigut inissisimaffia allannguajaatsorujussuaq.
Annertuumik naatsersuutiginggisamik pisoqanngippat patajaatsumik inissisimasartoq.

Nalunaarusiami malugineqarsinnaavoq erseqqissarneqarlunilu Nunatta aningaasaqarnera
avataanit pisunik sunnerneqaruni aalassassinnaasoq, tamannalu suli periarfissaviuvoq
siulittuutigineqarlunilu suli Ukrainimi sorsunnerup kingunerisaanik sunniutissai manna tikillugu
malugisimasatsinnit annertunerit takkussinnaasut. Tamanna nunatut aningaasatigut
inissisimanitsinnut ernumanarnera Siumumiit oqaatigivarput.

Taamaattorli patajaatsuunerata ilorrisimaartittariaqanngilaatigut, aningaasartuutit
qaffakkiartorneri, akiligassallu qaffakkiartorneri, akiitsullu qaffakkiartorneri qanoq
iliuuseqarfigingnikkutsigit ernumanarseratarsinnaavoq. Aningaasartuutikillisaasinnaavugut aamma
isertissinnaasagut aallunnerusinnaavagut.

Taamaattumik inuussutissarsiutigisinnaasatsinnik annertusaasariaqarpugut killilersuutillu
annikinnerpaaffianiitinnissaat pisariaqarlunnarpoq. Siumumiit isumaqarpugut ukiuni makkunani
silatusaartumik pipallatassaangitsumik suliassaqartugut, pingaartilluinnarlugu innuttaasut
peqataatillugit aaliangersaanerit annertuut ornitagut ingerlattariaqarigut.

Aningaasartuutikillisaanermi pisortat ingerlataasa annertussusia annermik sammisinnaavarput
nalilersorlugu ullumikkut atortorissaasutit ineriartornerisa suut teknologit atorlugit
suliariuminarnerulersimanersut pisariillisarlugit.

Pisortat ingerlataasa annikilliarortinnissaat isumaqatigiissutigineqareersoq pimoorullugu
ingerlattariaqarpoq, alloriarnissaq tulleq sapiissuseqarnerulluta tiguneqartariaqalerpoq. Inuit



suliffissaarunnissaat annilaangatigisinnaanngilarput nunami inuulluta nunatta annersaani sulisussaaleqinerup ajornartorsiutaatillugu. Siumumiit isumaqarpugut allanguusaaliusutut qunulluta illersorlutalu inissisiinnaanngitsugut nalunagu Nunarput pitsaanerusumik ingerlalissappat aaliangiagassat aamma ajornartorsiutitalit tigusariaqarlugit kingunissai pitsaasut ajortullu nalunagit ilisimallugillu.

Kalaallit Nunatsinni sulisussaaleqineq ajornartorsiutigilersimavarput, assaat sulisussat ingerlatatsinnik ikinnerulersimapput, sumiiffiillu ilaat sulisuliffissarsiortut amerlavallaartut takuneqarsinnaalluni. Taamatut equngasumik inissisimanerput suliassarivarput iluarsiiiffigissallugu naligiinnerusumik innuttaasut atugaqalissappata.

Sulisussaaleqinerup kingunerivaa suliffeqarfippassuit sulisinnaasunik tamanit tigooraapput pisariaqartivikkamikit, Siumumiit ernumanartua uaniippoq sulisussarsiorneq imatut inissiisalersimappat ilinniartut ilinniarunnaarlutik sullisilersimappata. Immini piffisaq qaninneq isigalugu aningaasanik isertitsineq ajungikkaluarpoq, ajornartorsiutitaali uaniippoq ilinniarsimanerup nukinga nunutta ullumikkut massakkut siunissarlu ungasinnerusoq Nunatta pisiaqartitaa sapangissannginnatsigu. Qanorluunnit ilinniarsimassutsip qaffassannissaa sapangissanngilarput.

Nunatta aningaasaqarnerata ilungersunarseriataassappat pissakinnerit kisimiillutik akilissanngimmassuk, silatusaassaagut aningaasarsiutigisinnaasagut nutaanik aningaasanik isertitsissutigisinnaasagut pingaaruteqartumik aaliangersaaffigissallugit, maani aamma pingaarpoq aatsitassarsiutinut periarfissagut aningaasaliisinnaasunut soqutiginarsaassalluta killilersuinerunata.

Ullumikkut inissisimanitta akissaarutsissanngilaatigut suliassanut pingaaruteqarnerpaanut taakkuuppullu meeqqat inuusuttullu ineriartortittuarnissaat. Nalunaarusiami takuneqarsinnaavoq ullumikkut meeqqat inuusuttullu pitsaanngitsumik atugaqartikkigut. Nunatut tamanna attatiinnarsinnaanngilarput.

Taamaattumik meeqqatsinnut suliassagut aalluttariaqarpagut meeqqagut inuussuttagullu suliassatsitut pingarnerpaatut isigalugit inunnik isumaginninnerup pissusissamisoortumik aaqqissuussaansoq nalilersorlugu, ilumut ullumikkut sanarfisimaneripput pitsaanerpaamiisillugu

suliniutit iluaqutaanngitsut piiarlugit, suleriaatsit naleqqutinngitsut piiarlugit.

Suliniutit iluaqutaavissut nassaaralugit atorlugit meeqqatta inuusuttattalu

ineriartuutigissammatigit.

Suliassarli inunnik isumaginninnerup kisimi kivissinnaanngikkaa ilisimavarput, suliassaq inoqarfitsinni meeqqat najortagaat aallaavigalugit sammisaqassaagut. Suleqatigiissapput atuarfeqarfiit, ilinniartoqarfiit, meeqqueriviit, meeraaqqueriviit, immikkut inissiisarfiit, angajoqqaat ilaqutariillu.

Aatsaat meeqqat nunatut atornerlukkunnaarutsigit, ulluinnarni toqqissisimasumik sinaakkuserutsigit naaffeqanngiusattumik atugarliortarnerat mumisissinnaavarput.

Siumumi suleqatigiissutigalugit soorlu aamma utoqqaat atugarisaat pillugit suleqatiserinnittugut ukiorpassuarni atuuttussanik iluarsiihfiginissaat sulissutigalugu suliaq aallartittariaqaratsigu. Utoqqaat atugarisaasa pitsanngorsarniarlugit inatsisit pilersissimasagut allanngortinniarneri eqqumaffigissavarput inatsisit imminut naalleraattut ilanngullugit iluarsiihfigisariaqarneri suliarissagatsigit. Taamaaliornikkut ataavartumik iluarsiinissatta qulakkeernissaa pisariaqartoq isumagineqassammat Siumumiit isumaqarpugut.

Ilinniarsimanerup qaffasinnerulersimanerata kingunerivaa kalaallit suliffeqarfimmiittut amerlanersaat aqutsinermik ingerlataqalersimasut, qanorli tamanna suli annertusaqqikkutsigu sulisinnaasut amerlanerpaartaat nunatsinni aqutseqataalersinnaaqqullugit ilinniarluta pikkorissarluta tamakkulu atorlugit aqutsinikkut avataanit pisariaqartitsisutut inissisimamera annikillissallugu. Taamatut sapiisersinnaagutta takorloorparput siunissamik Nunap inui aqutsilersimassasut, sinneri allamiut suliarortariaqartut suliarortissavagut immikkuullarissumik piginnaasaqarneri pissutigalugit imaluunnit naammattumik assassaqaannginnerput pissutigalugu.

Siumumiit isumaqarpugut ukiuni makkunani siunissamut ungasinnerusumut aaqqissuussinerit peqqissaarullugit suliarilluarlugit amerlanerpaat inooqataaffigisissaat pingaarutillit sisamat aalluttariaqarigut

Aaqqissuusseqqinnerit Aalisarnermi inatsimmik suliaqarneq, pisortani allaffissornermik aaqqissuusseqqinneq, kiisalu peqqinnissaqarfik pillugu aaqqissuusseqqinnerit inatsimmik nutaamik pisariaqartitsusut kiisalu minnerunngitsumik akileraartaneq pillugu

aaqqissuuseqqinnerit suliaapput uani qinigaaffimmi akisussaassuseqartumik tamanut inuuffigineqarsinnaanngorlugit aaqqissuunneqassasut. Toqqammaviliissimmata Nunatta ineriartornissaanut.

Inuiattut alliseequtitta ilagilluinnarpaat aaqqissuussisimagatta eqarpallaartumik ikioqatigiinneq suleqatigiinneq akisussaaffilersuineq akisussaaffimmillu tigusineq nammineq ingerlassinnaasatsinnik suliaqalerutta ineriartoqqilersinnaavugut. Soorluuna isumaqalersimasugut pisortat ingerlataani amerliartuinnarnikku ineriartortitsineq qulakkeersinnaallutigu tamanna kukkuneruvoq ataatsimoorluta iluarsisigu.

Ineriartorneq pisortanik killilersorneqartutut misiginermik malitseqartariaqanngilaq, ineriartorneq Nunap inuisa kiffaanngissuseqarlutik akisussaassuseqartumik inuiaqatigiinnullu tunniussillutik suliassaraat.

Nunarput alloriarnermut tullermut piareersarnerani pisariaqartipparput ikioqatigiinneq ataqaqatigiittumillu sulineq, ineriartorneq nutaaliornermik aallaavilik, kiffaanngisuseqarneq akisussaafeqartumik, Kalaallit Nunaannik ineriartortitsineq nunarsuarmioqataalluni.